



Comune de Nughedu Santa Vitòria
Provintzia de Aristanis

Comune de Nughedu Santa Vitòria
Provintzia de Aristanis

www.comunenughedusv.it

Sa redatzione de *Novas nughedesas* est contivizada dae su Servìtziu linguìsticu sardu de su Comune de Nughedu Santa Vitòria (Sotziedade Cooperativa L'ALTRA CULTURA)

S'isportellu linguìsticu est a disponimentu de tzitadinos, maistros de iscola, professores, istudiantes pro cale si siat informatzione, duda, bibliografia, sitografia in contu de sa limba sarda, pro consulènzias didàticas e pro cussizos chi pertocant sas règulas de iscritura de su sardu.

Su Servìtziu est abertu:
su **mèrcuris** dae sas **08,00** oras a sas
14,00

Newsletter periòdica de informatzione
istitutzionale de su Comune
de Nughedu Santa Vitòria

Sa lege n. 482 de su 1999, una lege de importu mannu pro sas minorias linguìsticas

Sa lege n. 482/1999 de s'Istadu italianu – *Norme in materia di tutela delle minoranze linguistiche storiche* – est una lege de importu mannu pro s'amparu de sas limbas de minoria. Custa lege, chi at permitidu a su sardu de intrare in manera ufitziale in sos



entes pùblicos, in sas **iscolas**, in sos **mèdios de informatzione**, est unu azudu pro afortiare s'impreu de sa limba sarda in forma orale e in forma iscrita.

In sa tutela de cale si siat limba de minoria no est de pagu contu a dda chèrrere e a dda pòdere faeddare in sos logos pùblicos e non solu in famiglia e cun sos amigos; cheret nàrrere a ddi dare sa matessi dignidade de sa limba italiana. Fàghere intrare su sardu in sos ufitzios, in sas iscolas, in sos giornales, televisione e ràdiu est serbidu a fàghere cumprèndere a chie ddu faeddat su valore culturale e ca non si nde depent bergunzare de sa limba issoro.

In sos ufitzios de s'Amministratzione Pùblica (Comunes, Provìntzias, Regione, Tribunale, ispidales ...) si podet trattare cun sos tzitadinos in sardu, si podet faeddare in sas riuniones de Giunta e in sos Cussizos e si podent fàghere tradutziones in sardu de sos atos pùblicos, de sos avisos e de sas comunicatziones.



In sas iscolas de cale si siat gradu si podet imparare su sardu e sas àteras matèrias in sardu.

Su sardu podet èssere faeddadu e impreadu in tribunale in ue, pro sos tzitadinos chi cherent faeddare in sardu, depet



èssere postu a disponimentu unu servìtziu de interpretariadu e de trascrizione e tradutzione de sos documentos.



Sa lege n. 482/99 permitit a sos Comunes de deliberare pro s'adotzione de sos **topònimos** in sardu: cheret nàrrere ca, paris a sos nòmenes italianos, podimus impreare sos nòmenes de logu in sardu: cussos de sas biddas, de sas carrelas, de sos montes, de sos frùmenes, de sos sartos....

A connòschere e a mantènnere sos nòmenes de sos logos in sardu est a dare valore a su patrimoniu culturale sardu, a afortiare su ligàmene cun su territòriu in ue bivimus, a cumprèndere menzus s'istòria de sos logos, de sas biddas e fintzas s'istòria nostra.

Semper gràtzias a sa lege 482/99, sos tzitadinos chi ant l'òmpidu sos 18 annos, si cherent, podent pedire de **cambiare su nòmene e su sambenadu** issoro in sardu. Chie est interessadu depet presentare sa domanda a su sìndigu de su comune de residèntzia, chi dda mandat a su prefetu chi cun unu decretu permitit de ddos cambiare in sardu.



Menzus duas limbas de una!

A faeddare in sardu est una richesa in prus.

Su cherbeddu bilìngue traballat menzus de unu monolìngue.

Fadda su sardu.

Isritu dae Marinella Marras